



S i à u - l i ā m T s â i  
( 7 / 1 1 / 2 0 0 4 ~ 9 / 2 4 / 2 0 1 2 )

10/5/2012 ~ 10/12/2015

Tsâi sī guán tshī ê káu-bó, tsing tshut-si 30-guā-kang, tú tng-ling, tō lâi guán tau, it-tit kàu 2012-nî 9-guèh 24 piat-sè. Tse 8-tang nng-kò-guèh kî-kan i koh senn 1-tsuí, tshiann 5-tsiah káu-á-kiann. Tsâi tshin-tshiunn guán ê tshin-lâng. Kap i sann-kap sing-uah ê jít-tsí sī guá jîn-sing tiong kik-kî pó-kuì, tik-sû ê thé-giām, mā tsiann-tsò 1-tuānn un-luán ê kì-tí. Kám-siā Siōng-tè hōo Tsâi kap guá hōo-siong ū-hūn tī pí-tshú ê senn-miā, suà kiàn-lip khuà-bút-tsing ê tshin-bi't iú-gí.

Tsâi tī Tâi-tiong tshut-si. Hit-tang-tsūn guá ê hák-sing Tsì-ui in tau huè-guā ê dachshund 「小黑」 senn 4-tsiah kiann, 3 tsiah bó--ê, 1-tsiah kang--ê. Tsì-ui tsai, guá ū tshī 1-tsiah hóng-á, tsiū-sī 4-huè ê Oo-tshuì (March, 2000~7/15/2013), i kóng beh hōo guá ke tshī--1-tsiah, suà tī 2004-nî 8-guèh-bué kap in pē-bú tuì Tâi-tiong sái-tshia lâi Ko-hiông, tshin-sin phō Tsâi kuè--lâi. Tú muá-guèh, Tsâi phak tī 1-kha sì-kak tân-nâ-á lâi, sing-khu ē-té tsū 1-tè pòo, bák-tsiu kheh-kheh, khùn kah tsin lòh-bîn. I ê tshuì kap hīnn-á té-té, kiu--teh khùn ê bōo-iunn bē-su 1-uân oo-muâ-tsí. Tsâi in a-pâ tng-mng tshiah-sik, m̄-ku in tsit-tsuí lóng tsing-tiòh in bó, moo té koh oo-kim. Tsì-ui kóng, Tsâi siōng gâu kap in lāu-bú tshit-thô.

Keh-tng-jit guán tshuā Tsâi kiau Oo-tshuì khì Tevocan (Sin-huà) ê Hóo-thâu-pi, hia tng teh pān 「水與綠嘉年華」. Tsâi phak tī sì-kak nâ-á-lâi, iū-guān hó-khùn-sîn, tsuē-tsuē lāng hònn-hiān uí leh kā thàm, i tsò i khùn. Hit-kang kiann 3-hō ko-sok kong-lōo, tsiunn-pak kuè Tiong-liâu pōng-khang liáu, kiám-tshái guá bē-kì-tit kā tuā-ting tshiat hōo hua. Kā tshia pha tuà Sin-huà Ko-kang, kàu hit-e-poo beh khì khan, tsiū huat-bē-kiann, tio' h tshiann lāng lâi ù.

Tsâi tsin khiáu, m̄-kú kò-sìng kiông, liân miâ to ka-kī “kíng” . Pún-tsiân guán m̄ sī kā hō-tsò “Tsâi” , tsóng-sī kā kiò pa' t-ê miâ i lóng m̄ tshap--lâng. Ū-1-pái guán lāu-bú sim-sik-hìng kā kiò “A-Tsâi” , bô-gî-gōo i suah ū huê-ìng, tsū-án-ne “Tsâi” kiò-tiâu--leh.

Khí-thâu 2-tang Tsâi tshī tī guán pē-bú hia, hông kuainn tiàm láng-á-lāi, i ē giáh-thâu tuā-siann puī, bē-su kâng lé, piān-nā khuànn-tiòh guá, koh puī jú hiông-kông, siann ná tsiam, siann-sàu ná pik-tshiat. Tsit-ē kā láng-á-m̄ng giú-khui, i suī tsông--tshut-lâi, tui Oo -tshui ê pak-tóo-kha nng--kuè, ná teh nng pōng-khang, mā ē tsáu-lâi kā guá tah, beh hông lám. Guá khū--lòh-lâi, Tsâi thiàu-khí-lâi kā guá tsīnn, i ê tsìh sàu kah kín koh tuā-lát, tshin-tshiūnn teh kâng sé-bīn, bô 1-tiap-kú, guá kui-bīn kô i ê nuā, sio-sio siūnn-siūnn. Ū-tang-sī i ê tshui-khí, tsìh hām phīnn-á tsóng tuh-jíp-lâi guá ê phīnn-khang kap tshui--nih, ná-tshiūnn teh kā lâng “tshǎg” . I ê tshui-nuā tuà 1-káng sng-khui kap tshàu-tsho-hiàn, kài sīng muā-sat-bák ê bī. Kinn-nā khuànn Tsâi án-ne tsham guá aih-sah-tshuh, guán lāu-pē tsiū huah ” M̄-tō sing khi khuànn lāu-bú, m̄-thang kòo hām káu-á sǎg!”

Káu-á kap lâng tsi-kan ū 1-tsióng tshiau-uát giân-gí ê hōo-siong khan-ín. Tsâi thâu khi-khi, i hit-tui tshim-ôo tê-bí-sik ê sann-kak-bák lia' h guá kim-kim-siòng, iōng ōng-ōng ê puī-siann teh kā guá sio-tsioh-m̄ng ê sī, guán hōo-siong tsai, tui-hong sī buddy. Āu-lâi guán lāu-bú siūnn-beh kā Tsâi hōo--lâng, tsiū hōo guá phō-lâi tshī. 2006 khí, Tsâi kap guá tuà 6-tang-guā, thâu-tsīng 5-tang tī lâm-tiānn-poo. Thàu-tsá thàu-àm Tsâi kap guá tsham Tshui sann-kap kiānn Ài-hô á-si Kohiông-káng-pinn ê thih-ki-lōo pōo-tō. Ū-tang-sī guán khi peh Tshâ-suann, sīm-tsi khi koh kah h̄ng-tōo. Sui-bóng kha té, koh thua 7-kong-kin thé-tāng, Tsâi iū-guân tàk-jiah khàng kah kàu. Bô juā-kú i puī-nng, ná Corzilla (khíng-líng)ê thé-keh tsiām-tsiām suh-mah-tooh khi--lâi.

Kap káu-á tau-tīn, tsiah huat-hiān in ū tsin tsuē kī-biāu ê sóo-tsò. Oo-Tshui kinn-nā pàng-jiō, Tsâi tik-khak tuà kâng-jiah kā “póo” 1-pū, sìm--kuí-tih-á mā hó, bē-su tuè teh ue' h tē-puānn ? Koh, in nng-tsih lóng ài tó tuà tsháu-poo lù kha-tsih-phiann. Tsâi tiānn-tiānn tó tshìò-tshìò, píng i ê pak-tóo hông so, ngiau, tah, kiám-tshái teh piáu-sī i kap lâng “phuà-pak lâi sann-kinn” ? Līng-guā, Káu-á hìng lù kī-tha tōng-bút ê sí-thé, phì-lūn-kóng tsiáu-á, niáu-tshú-á, sì-kha-á ê sin-si; káu-á ká-ná kah-i sí-thé ê àu-nuā-hiàn, kā tòng-tsò phang-tsuí lâi buah ? In nā khi kô iáu-bē uân-tsuân ta-pôo ê sí-thé, tsiū kô kah siūnn koh liām,

tshàu-hiam bô-tè-pí, ná sái-hák-á ê khi-bī. Guán kā tsit-tsióng “káu-á phang-tsuí” hō-tsò “kái-pinn-bī--ê”. Tsâi nā tuà tsháu-poo lù kah lòk-thiòng kah, guá ê sîn-king-suànn suí ká-ân, kín kā hiàm.

Tsâi ê thâu sè-liáp, m̄ng oo-kim ngē-si, bué t̄ng, tshuì kap phīnn mā tsiam koh t̄ng, ná ah-á tshuì-pue, sing-khu puī kah ná 1-ki kuàn siunn pá kiông-beh piak--khui ê oo-iân-tshiân. Ū-tang-sī i kā thâu khuè tuà guá ê tshiú-pôo hōo gúa so. “Tsâi, lí ū-kàu s̄ng tsiam-sô-á neh, koh bē-su khióng-l̄ng leh.” I ê phīnn pí tshuì kah thóng, tiānn-tiānn iōng hit-ki phīnn kā l̄ng ù. Kuānn--l̄ng nā hiông-hiông kha-tóo, kha-āu-tinn 1-tsūn thàu-sim-l̄ng, kiông-beh ka-lún-sún, ún-tàng tō sī Tsâi iōng phīnn k̄ng thok. Guá khū--lòh-l̄ai, Tsâi ē tshun i ê thâu-ts̄ng-kha tah guá ê kha-thâu-u. I ê 2-tè hīnn-á pòh koh tuā-phiánn, guá khin-khin-á kā giú--khui koh h̄p-uá, ná teh iat khuê-sinn. “Tsâi, lí ê hīnn-á tsiok s̄ng tshiat kah pòh-li-si ê lóo-gū-bah ooh!” Guá nā kuī--lòh, ànn--lòh teh kuan-tshat tsháu-á-hue, Tsâi tsáu--l̄ai, tuì bīn, b̄k-tsiu tiō ts̄ng--lòh--khi, lián b̄k-kiànn iā hōo ts̄nn kah kōo--khi, sūn-suà kā i puī-tsh̄ng-tsh̄ng ê sing-khu t̄ng tuà guá teh siòng ê tsháu-á-hue t̄ng-bīn, “Tsâi---!”

Ták-mê guá kā -Tshuì, Tsâi uānn tsuí, sé in ê uānn, lóng sūn-suà kā Tsâi phō--khí-l̄ai. I k̄u-n̄ng, kiát-sit ê sing-khu uá tiàm guá ê hing-khám, tsiānn sio-lō. Siāng-sī Tsâi “kuh-kuh “ hinn, ná hún-tsiáu tshim-t̄m ê siann, tshin-tshiūnn teh kóng, i hōo l̄ng phō--leh mā tsiānn buán-tsiok. Nā l̄ng kah kú bô kā sé-sing-khu, Tsâi sing-khu ē tshut 1-tsióng khi-bī, ná bah-hú, ōo-á, kap oo-hī-tsí ê bī, bē-pháinn-phīnn.

Tsâi koo-ták-s̄ng, Oo-tshuì í-guā, piān-nā p̄t-tsiáh káu uá-kīn, i tiānn-tiòh giàng-gê puī, kha-tsiáh-phiann ê m̄ng suí tshàng 1-tsuā. Ū-1-pái 1-tsiáh tshiah-sik tsin tuā-keh ê Irish setter káu-kang tsáu-l̄ai kā Tsâi l̄ng, Tsâi t̄ai-sing tiām-tiām, hiông-hiông uat-t̄ng-sin thiàu--khí-l̄ai, giàng-gê puī tau-tuā-siann. He káu-kang kiann kah thè kuí-nā-pōo, hiám-hiám puáh--tó, khan i ê Hui-lút-pin tsa-bóo-l̄ng khuànn-1-ē suah kók-kók-tshiò. Tsâi sai-tsiáh, tsiáh-p̄ng ná tsing-piàng, kanta kòo thun bô teh pōo. Guán l̄au-bú m̄-kánn tshun-tshiú thèh mih kā tshī, kiann-liáu kuà ts̄ng-thâu-á hōo hut--khi. Sui-jiān Tsâi guā-piáu ok-khiák-khiák, k̄ng-sit bô-tánn kiam sîn-king-tsit. Guán nā t̄ng-l̄ai kàu tshù-m̄ng-kháu, i lóng p̄ng Oo-tshuì t̄ai-sing puī, siann-im tsiam koh ōng. Tsâi kiann phàu-á-siann tsham ian-hué. k̄inn-nā t̄ng-tiòh n̄u-jiát-t̄in tsiū khòk-khòk-tsông beh bih--khí-l̄ai.

2010 10--guèh guán lāu-pē jíp-īnn. Ka-tsài Bân-bân Tiúnn-ló Kàu-huē ê lū Siok-ing bók-su-niū tsham Lîm Thiòng-iú bók-su hōo Oo-Tshuì kap Tsâi tuà in tau 1-kò-guèh, thang hōo guá khi kòo lāu-pē. 11-guèh tshe-5, guán lāu-pē tshut-suann ê tsîng-1-kang, Lîm bók-su kâ Tsâi sé-sing-khu liáu, kâ pàng tuà lé-pài-tng tsiân-tiánn phák-jit, bók-su ka-kī jíp-khì tshù-lāi siá tsiu-pò. Hit-tsūn Tsâi puànn-nî 1-pái ê period tú sé--kuè. Bók-su liáh-tsún án-ne tō “an-tsuân” . 5-hun-tsing āu i tshut--lāi, khuànn-tiòh in tuì-bīn tshī ê Maltese káu-kang tng teh kap Tsâi kau-búe. Bók-su ai 1-siann, lián bók-su-niū tī 3-lâu to hōo tshuah-1-tiô. In kín kâ Tsâi tshuā-khì Tiô-tsiu 1-king siù-i pēnn-īnn. Siù-i kóng, tsù-siā phiah-thai, ài lián-suà 3-ít tsù 3-pái. Bók-su khó-lū tsòng-sik í-āu guá suī beh tshuā káu-á tò-tng, kiann án-ne huì-khì, tsiū kuat-tīng mài tsù-siā, tsiáh 3-jit phiah-thai iòh-á tō hó. Siù-i nauh--1-kù, “tsiáh-iòh-á khah bô-hāu!” Siànn-siànn.

Bók-su-niū āu-lāi hîng-iông tsit-tsiáh káu-kang thai-ko, lāu, koh sè-tsiáh, in tsú-lâng bô-siánn kâ tsiàu-kòo. Hiâu-hīng Tsâi bē-tsîng sūn-guèh, in ang tsiū tī Bân-bân hōo tshia kauh--sí, in kiánn mā suah piàn-tsiánn-tsò mng-kiánn.

Hit-tsām guá tng teh tsún-pī phok-sū-pan ê tsu-keh-khó. Ū-1-kang thàu-tsá kâng-khuán khan Oo-tshuì, Tsâi khi kong-hng, 1-ê pēnn-pēnn tshī káu-á ê “káu-iú” kí Tsâi kâ guá mng, “lín tsit-tsiáh kám-sī ū-sin ah ?” Guá tshiák-1-tiô. Tsâi tsit-tsām tuā-khoo ê iūnn-siūnn khak-sit kī-kuài, pak-tóo siang-pīng-pinn thóng 2-tè kak tshut--khì, sui-bóng hín i kha-tshiú iáu mé-liáh, iáu ē-thang píng-sin. Guá tshuā Tsâi khi hōo 1-ê siù-i píng-iú khuànn-māi, bē-tsîng tán guá khui-tshuì, i tsiū huah, Tsâi ū-sin, pak-tóo king tsiáh tuā, tik-khak ē senn tsuē tsiáh. Kàu tsia lâi, beh phiah-thai mā bē-hù ah. Siù-i kóng, Tsâi tsit-tsióng káu-á siōng-tsuē thang senn kah 4-tsiáh, jī-tshiánn lân-sán tiòh phuà-pak ê ki-lút tsiánn kuân. Án-ne puànn-mê nā kan-khóo-senn, mā tiòh lún-kàu thinn-kng tsiáh kâ tshuā-lāi tshiú-sút. Káu-á ū-sin kī-kan iòk-liòk 60-kang. Tsâi ê ī-sán-kī tī 2011-nî 1-guèh tshe-gōo.

Tsit-tsām, guá tsún-pī beh tuì lâm-tiānn-poo puann-khì Lāi-úi kap guán lâu-bú khiā, tsiū kôo 2-kha tsiok tuā-kha ê gū-phuê-tsuá khueh-á, 1 uī khng 1 ê, thang hōo Tsâi tsò sán-pâng, mā tshuân tsin tsuē kū-sann kap pòo. Kā Tsâi phō ê sī mā ài tik-piát kín-sīn, ū-tang-sī phō-liáu m̄-tiòh-sè, i bô sóng-khuài ê khuán, ē bûn-bûn-á-hinn. Siāng-sī, guán khai-sí thè Tsâi ê kiánn tshuē tsú-ke. Lâm bók-su sīm-tsi tī tsò-lé-pài tióng-kan kóo-bú huē-iú lâi jīn-ióng Tsâi ê kiánn.

2011-nī nī-tshe, Tsâi sūn-guèh, Tâi-uân tú-tiòh 40-nī lâi siōng kiōng ê hân-liū. 1--guèh tshe-jī, lé-pài, tsái-sī-á tuì Lāi-úi kuè-lâi lâm-tiānn-poo, uá-tàu, guá khan Tsâi kap -tshuì khì thih-ki-lōo-pinn sán-pōo. Tsâi bô tshiūnn ping-siōng-sī pàng-jiō, koh bô-siánn beh kiánn, i ê ē-sin ū oo-tòo-âng siūnn-siūnn ê hueh siap--tshut-lâi, tãi-khài teh tshui-tsūn ah. Guá kín tshuā in tng--khì, kā Tsâi phō-jip “sán-pâng”. I thán-khi-sin tó--leh, bô hainn puànn-siann, m̄ tsiáh-mih iā m̄ tsiáh-tsuí.

Hit-e-poo 2-tiám-guā, hut-jian guá khuànn-tiòh tsuá-khueh-á-lâi ke 1-tsiáh káu-á-kiánn, ná niáu-tshú-á hiah tuā-tsiáh, kui-sing-khu hún-âng, huat 1-iân pèh moo. Tsâi tī pinn--á tng-teh tsiáh ui. “Senn ah !” beh uá-kīn khuànn hōo tsin, Tsâi suah h̄m-h̄m-kiò, ok-khiák-khiák kā guá tsīn, ná-tshiūnn kiann guá tshiúnn in kiánn. Suà-tsiap i senn-liáu thau tsit-nng-kang tuì lāng lóng sī tsit pān hīng, siù-i kóng, tiòh kik khiáu ê káu-bó tsiáh ē án-ni-sinn.

Tshut-tsāi bó-sing ê pún-līng, Tsâi sui-bóng thau-1-pái tsò lâu-bú, suah ná-tshiūnn tsin si'k-tshiú tsit-iūnn, kā ui kā hōo phuà, pōo-pōo leh thun--lòh, koh kā in kiánn kuà tōo-tsâi-tuà kā-khí-lâi hàinn, tán kah tuà tng--khì, tsiáh iōng tshuì-khí tshng, thè kiánn tng-tsâi, suà iōng tshuì kā kiánn lu koh ping kuí-nā pái, kā in sing-khu-tíng ê hueh kap la-sâm lóng tsīnn tshing-khì koh tsiáh--lòh-khì. Tsâi ê kiánn hōo in bó hàinn koh tsng, ki-ki kiò. Kā kiánn tánn-tiap sù-sī, Tsâi koh kā sì-khoo-úi tsīnn hó-sè, tsiáh hōo kiánn uá-lâi i ê pak-tóo-pinn tsiáh-ni. Thau-tsiūnn-á senn-liáu, Tsâi tenn tsin kú, kàu 4-tiám-guā tsiáh senn tē-jī-tsiáh, m̄ng tng koh oo-kim. Tsit-pái guá sing tsiú tī pinn--á. Káu-á-kiánn tú senn--tshut-lâi pau tī 1-liáp oo-sik, liòh-á thang-kng ê ke-kui-á lâi-té, tsiū sī ui. Tsâi kā ui kā phuà, hōo tsuí-phè phuà-khang lâu--tshut--lâi, suà--lòh tsiáh tng-tsâi. Tsâi senn 5-tsiáh kiánn, lóng tsiáu tsit-ê SOP. Phóo-thong-sī “siáu-siáu” ê Tsâi bô-gí-gōo tsò lâu-bú suah tsò kah tsiáh khí!

Tē-jī-tsia̍h kap tē-sann-tsia̍h tshut-sì ê sī-kan làng 5 tiám-tsing kú. Tsâi tit-tit tenn, kuí-nā-pái 1-kiû ui bîng-bîng to tuì senn-m̄ng thóng--tshut--lâi ah, suah koh tò-kiu--jíp-khì. Kàu hit-mê 9-tiám-guā tē-sann-tsia̍h tsia̍h tshut--lâi, mā sī oo-m̄ng--ê, hīnn-khang huat tshiah-âng ê moo, kiám-tshái tsing-tiòh Tsâi in lâu-pē. Liâm-pinn 9-tiám 45-hun, tē-4-tsia̍h tsit-ê tuì senn-m̄ng bok--tshut--lâi, tsuí-phè suí phuà, lōo-hiān pèh-sik tshàng bí-êng ê moo, Tsit-tsia̍h ê thé-keh sán-thiu, bīn-lōo-á ná sai-á.

Tán Tsâi koh bô-îng 1-khùn, í-king puànn-mê, i than-khi-sin tó--leh, 4-tsia̍h kiánn mā tó--leh, thâu tsiâu uá i ê pak-tóo, bú-á-kiánn ánn teh khùn. Huê-sióng siù-i ê uē, “kik-ke 4-tsia̍h”, liáh-tsún senn-hó ah. Tsit-kang tú-hó lé-pài, pēnn-īnn hioh-ká, Tsâi nā kan-khóo-senn, m̄-tsai beh án-tsuánn? Nā phuà-pak, káu-bó huān-sè ē bô ling. Tiòh-tsún bé káu-á-kiánn ê formula gū-nī-hún phàu tuà káu-gū-ni-kan-á kā in tshī, sóo-huì kuì koh liáu-kang, bián 1-kang guá tō tiàu-tiánn. Ka-kī tuè Tsâi hut kui-kang, ka-tsài it-tshè sūn-sū pīng-an, guá khi khùn ê sī, án-ne kám-siā Siōng-tè.

Hit-mê ná khùn ná thiann-tiòh tsuá-khueh-á-lāi khi-khi khòk-khòk, káu-á-kiánn ki-ki-hainn, lóng tsún-tsò Tsâi teh kā in kiánn tshī-ni sé-sing-khu. Kàu huan-tng-kang e-poo tsia̍h iánn--tiòh, khueh-á--nih ke 1-liáp thâu, oo-oo, sè-sè-liáp. Bók-kuài! Mê--sī hiah ka-iah, tō-sī tsit-tsia̍h ban-kiánn tshut-sì! Tók-tók i tī 1-guèh tshe-sann senn, pí in hiann-ko tuā-tsí ke tsiok sè-tsia̍h, khi-la 't kiám-tshái iā ū-tsha, pát-tsia̍h teh tsiáh-ni má-lâi má-khì, kan-ta i kiu tuà pinn--á m̄ tín-tāng. Lōo-bué guán kuat-tīng lâu tse ban-kiánn tshī, hōo i tuè bó khah kú leh, ni tsiáh hōo tsiâu-ūn. Kī-tha 4-tsia̍h muá-guèh āu tng-ling, tsiū hōo--lâng ah.

Kā Tsâi tsò-guèh-lāi, guá tsiàu lāng ê huat-tōo, 1-kang tshuān 6-tng. Tú senn-liáu phàu gū-nī tsham oo-thng hōo lim. Tū-khì tshī-liáu, koh tsú bah, ti-kuann, ke-kuann, kā i pío. Káu-á tsiáh kiám ē sng io-tsí, sóo-í Tsâi tsiáh-ê mih ài ling-guā tsú, bē-sái tsham iām. Khó-līng íng-ióng ū kàu-giáh, Tsâi nī-tsiap pá-tsiok, 5-tsia̍h kiánn m̄-nā tsóng uáh, koh tshiānn kah hàng-ni, m̄-bat suh bô ni teh hinn. Siù-i mā o-ló Tsâi “hó lī-hāi!” Tū-khì sing-sán hit-kang bô tsiáh, Tsâi ká ná put-sī to pak-tóo iau, tak-pái guá bē-tsīng phāng hōo lim-tsiáh, i tsiū huānn tsuá-siunn-á-kīnn khiā--khí-lâi, ná thām-thâu ná hinn. Guá bô kā tsuí khng tsuá-khueh-á-lāi, kiann-liáu tshia-tó kā in kiánn bak-tām--khì.

Tsò lāu-bú ū-iánn ngē-tauh, Tsâi guéh-lāi hán-tit khùn, liân tsiáh-p̄ng to kông-kông hù-hù, kui-jit m̄-sī teh tshī-ni, tsiū-sī kā kiánn píng koh tsīnn sé-ik, kā in ê sái, jiō lóng thun tuì ka-kī ê pak-tóo khi. Tsâi sui-jiân tsiáh liōng tsuē, m̄-kú piàn tsin sán. Muá-guéh í-āu i ē-sin tshut-hueh bô tsuân-jiân tsí, put-sám-sī bak--leh bak--leh, huân-sè tō-sī io kiánn ap-lik siunn tuā ê iân-kòo. Tiòh tán kah 4-tsiáh káu-á-kiánn lóng hōo--lâng, koh in-uī guá beh khó tsu-keh-khó, liân ban-kiánn iā tsiām-sī kià Lîm bók-su hia, Tsâi tsiah ū thang hioh-khùn, hueh-kha tsiah siu-suah.

Guéh-lāi káu-á-kiánn tsiū khui-bák, mā huat tshuì-khí, khí-huānn ē tsiūnn, tsiáh-ni ê sī kā Tsâi gè ni. Tsâi ē thiánn, tiānn-tiānn ná tshī-ni ná khiā--khí-lâi, iū-guān jím-nāi m̄-kam kā kiánn pháinn.

Tú senn-liáu, Tsâi tsuân-tsing-sîn kòo-kiánn, sái-jiō m̄ pàng, guá mā m̄-kánn kiōng kā phō--tshut-lâi pàng, kuí-nā-pái kā m̄ng, i lóng bô huê-ìng. Kàu tē-jī-kang tshim-mê, hiōng-hiōng káu-á-kiánn kainn-kainn-kiò, tsuá-khueh-á-lāi tshit-tshok tuā-sè-siann. Tsâi sái-jiō kìm-bē-tiâu, tshuā--tshut-lâi ah. I tsin àu-náu, hiōng-kông, kā khueh-á-lāi ê pòo khàm ka-kī ê sái-jiō, ná tsīnn in kiánn sing-khu-tíng bak--tiòh ê lâ-sâm. Tsit-sī guá bô koh kòo-lū, tshun-tshiu jip-khì kā tau-tshing, tau uānn pòo. Tú-khai-sí Tsâi iáu tsiānn kín-tiunn, āu-lâi tsai-iánn bô hông tau-sann-kāng bē-tit, koh guá iā bô hāi in bó-á-kiánn ê ì-sù, i ê kài-pī-sim tsiah tauh-tauh hòng-hā. Keh-tng-mê guá sé-sing-khu suah, tuì ik-king tshut--lâi, thōo-kha kuí-nā-pû sái kap jiō, sī Tsâi tuì tsuá-khueh-á thiàu-tshut-lâi pàng--ê. Tsit-sī í-king tsin uànn. Sio-liân-suà bú kuí-nā-kang, tsiānn thiám, tann sing-khu sé-tshing-khì beh lâi khùn, tiòh koh bak sái-jiō, guá tsàm-bē-tiâu pàng-siann-khàu,. Tshing kah tsuá-khueh-á hia, guá siū-khì kā sak, khueh-á lòng-tiòh piah, ka-tsài tsuá-phue kāu, guá mā bô tshut-tuā-lát, káu-á-kiánn tsò in khùn. Tsâi iōng 1-tsióng khui-khiàm, uí-khut ê bák-sik kā guá khuànn. Lōo-bué i kā thau khi tuà tsuá-khueh-á-kinn, tiām-tiām hōo guá so. Keh-tng-jit i khiā--khí-lâi thó-tsiáh, guá sūn-sè kā phō, i bô huán-khòng. Guá kā Tsâi phō kàu guā-kháu ê tsùn-pinn-á, tshī i tsiáh, mā pun Oo-tshuì tsiáh. Liáu-āu, Tsâi tsiū pàng-sái-jiō, guá tshing-tshing leh, sūn-suà hōo i sió-kiánn--leh, tháu-khuì--leh, tsiah phō i jip-khì io-kiánn. Tshú-āu sái-jiō tsit-ê tuā-tiâu tsi-tsi tsiah kái-kuat.

Suà-tsiap n̄ng lé-pài, thàu-tsá kap bué-àm-á Tsâi nā khuànn guá tshuā Oo-Tshuì khì sànp-ōo, tsiū tuì tsuá-khueh-á khiā-khí-lâi tham, ná-tshiūnn siūnn-beh tuè guán khì. Khí-thâu kan-ta tsái-sí-á tsit-tsuā ū tshuā i tsò-hué tshut--khì, āu-lâi tsá-àm n̄ng-tsuā lóng hōo tuè. Tsâi tsin huann-hí, tsit-lōo tsáu tsiok kín, ká-ná tsin pó-sioh tse sann-sì-tsáp hun-tsing tháu-pàng ê làng-phāng. Káu-á-kiánn tsiām-tsiām tuā-tsiāh bat-tāi-tsi, nā phō in bó tshut--khì, lóng ē hinn. Tsâi tò--tng-lâi, tsiū kín thiàu-jíp khueh-á-lâi.

Ū-1-pái thàn guán khì sànp-ōo, guán hāu-senn kā káu-á-kiánn phō--khí-lâi sūn, tsiah tsai tòk-tòk tē-2-tsiāh tshut-sì--ê sī kang--ê, tshun--ê lóng sī bó--ê. “Lán-tau im-khì tsiānn kiōng, kan-ta n̄ng-ê tsa-poo--ê.”

Hiàng-sī guán tau tsóng-kiōng 7-tsiāh káu, káu-kháu sī jīn-kháu ê tīng-puē khah-ke. Tsīng káu-á ê tsiāh-mih kap too-háp koh hun-tsò 3-khuán. Sui-bóng m̄-kam, tsiong-kui-bué káu-á-kiánn iáu sī tiòh pun lāng tshī. Tiòh khak-tīng thiānn káu-á ê lāng, guá tsiah kam pun in. Tū-khì tē-4-tsiāh “Sai-á-bīn--ê” lōo-bué im-sìn tng--khì í-guā, guá lóng ū khì kā tsiah káu-á-kiánn ê sin ka-tīng thām--1-ē, khah an-sim.

Tsâi ê kiánn lóng sī tng-m̄ng--ê, thé-hīng mā tng, senn-tiunn sīng ang-á-mih káu-á. Thâu-tsiūnn-á guán kā hō-tsò “Pèh-ti-á”, thâu siōng tuā-liáp, siann siōng ōng, gâu tshiūnn-tsiāh, tiānn-tiānn tuì in sió-tī sió-muē ê sing-khu-tíng pē-kuè, tó--leh kap Tsâi ping-hīng teh tsiāh-ni, kā kui-pīng ê ni-thâu tsóng tsáh. I hōo Lāi-ūi ê 1-ê pīng-iú tshī, in kā miā-tsò “Kâu-kâu”. Suà-lòh 3-tsiāh lóng tsò Kheh-lāng káu-á. Tē-2-tsiāh hōo Līm bók-su hu-hū tsò hāu-senn, in kóng tsit-tsiāh “phì-tuh-tuh” (pūi-tsu-h-tsu-h), tsiū kā miā-tsò “Tuh-tuh”. Tē 3 tsiāh Ngiuh-ngiuh, hōo bók-su-niū ê tsik-peh sió-tī pun--khì, tuà tī Lāi-poo-á Tūng-phián ê iú-ki lōng-tiūnn, í-king senn n̄ng-tsuí 6-tsiāh kiánn. Tē-4-tsiāh “Sai-á-bīn” thiann-kóng 2012 mā senn 3-tsiāh. Tsiap-tiòh tsiah-ê siau-sit, guá kā Tsâi kóng, “Lí tsò má ah, guá mā sing-kip tsò a-tsóo.”

“Sai-á-bīn”, Tuh-tuh kiau Ngiuh-ngiuh beh hōo bók-su phō-tsáu ê sī, guá kā in 1-tsiāh 1-tsiāh phō--leh, lám--leh, tsiah kā khng tuà līng-guā 1-kha tsuá-khueh-á-lâi. Tsiāh tshut-sì 30-kuí-kang, in tsiū ē-hiáu jīn-lāng, it-tit hinn, siūnn-beh tuì khueh-á liòng--tshut-lâi tshuē--guá. “Pèh-ti-á” tsá in 1-kang hông phō--khì, thiann-kóng mā hinn kui-mê.



Tsing hit-tsun guá tsiū m̄-bat koh khuann--kuè “Sai-á-bīn”. Phō--khì tong-mê bók-su kā phō khì hōo Bân-bân 1-tuì kok-sió lâu-su hu-hū. Bók-su-niū phín kuí-nā-pái, kóng in tuà--ê sī ”豪宅”. Tsóng-sī āu-lâi tsit-tuì ang-á-bóo bē-kham-tit “Sai-á-bīn” tú lī-khui lâu-bú, koo-tuann 1-tsiah khah ài-háu, koh kā sàng hōo tông-sū tshī. Bók-su-niū in ū-1-pái tī Tang-káng-khe huānn-pinn tng-tiòh “Sai-á-bīn” kap in tsú-lâng. I kóng Sai-á-bīn tsiānn kóo-tsui, bí-âng-sik ê moo tng koh suí, āu-lâi tsiū thiann-kóng Sai-á-bīn senn--ah. Guá bat m̄ng bók-su-niū kuí-nā-pái, kám koh ū “Sai-á-bīn” sin tsú-lâng ê siau-sit, i lóng ìn-kóng bô-tè liân-lók. Kī-si' t “Sai-á-bīn” sī-m̄-sī tuà 「豪宅」, kin-pún bô tiōng-iàu, guá iàu-ì--ê sī ka-kī ê káu-á-kiánn kám ū tit-lâng-thiann ? Mā kan-ta ē-tàng thè “Sai-á-bīn” kī-tó niâ.

Guán lâu ban-kiánn Káu-kuài ê līng-guā 1-ê guān-in, tsiū sī i ê guā-māu. Kap in a-hiann a-tsé phīng, Káu-kuài ê m̄ng phú-phú thūn-thūn, thé-keh khah sán-thiu, senn-tiunn bē siānn--lâng. It-puann-tik lāng kah-ì suí--ê, beh kóng “hó-ê” khì tshī. Guá hi-bāng tsiah-ê káu-á-kiánn khì lāng-tau tsò kiánn, lóng ē hông sioh-miā-miā.

Ban-kiánn “Káu-kuài” ê miā ū in-tuann tī--teh. Thing-hāu in hiann-ko tuā-tsí lóng lī-khui, piān-nā guá tshuā Tsāi khì sànpōo, tshun ban-kiánn 1-tsiah tuà khueh-a-lāi, i tsiū ti' t-ti' t puī. Ū-1-pái i koh án-ne teh puī, guán lâu-bú kā mē, tse káu-á-kiánn suah thiàu kui-pōo, puī jú tuā-siann, ná huat-sìng-tē teh kàng tshiàng. Tann bô hiann-tsé tsham i tsenn, tsit-tsiah ban-kiánn teh tsiáh-ni tsiok la-thian, 1-liáp ni-thāu suh bô n̄ng-tshuì suí suá-khì pát-liáp, àm-sī koh khuè tuà in lâu-bú kui-phiánn ê ni-poo-tíng khùn, ū-iánn tsih-tsuah káu-kuài. Lōo-bué-tshiú guán kā Káu-kuài té tuà 1-kha tshenn-sik pòo-tē-á, kā phō--leh, kap in bó koh-ū Oo-tshuì sann-kap khì sànpōo, Káu-kuài i ê thāu put-sī thàm--tshut-lâi, sì-kè siòng.

Tsu-keh-khó kiam huat-lòh puann-tshù hit-tsām, koo-put-tsióng kā Káu-kuài kià tī Līm bók-su hia 5-kò-guèh, kàu 2011 7--guèh tshe-it tsiah kā tshuā-tò-tng. Tán kah Káu-kuài iā lī-khui, Tsāi tsiah kóng-síng, i ê kiánn bô--khì ah, tsiū khai-sí khàu. Tsìn-tsing 4-tsiah hông phō-tsáu, bô-tiānn in-uī Káu-kuài iáu tī--teh, Tsāi pīng bô tik-piát ê huán-ìng. Tsóng-sī Káu-kuài hông phō--khì hit-mê, Tsāi hinn bô suah, siann-tiāu pi-tshiat peh-pak, koh phak tī guán phō káu-kuài hit-kha tshenn-sik tē-á-tíng, ná phīnn ná khàu, kú-kú m̄ tín-tāng, lâu-bú sit-khì tshin-sinn-kiánn

ê khóo-thàng, khuànn-tiòh hông tuè i kan-khóo-sim koh m̄-kam. Guá kã Tsâi phō-khí-lâi, kã tah koh iô, tshin-tshiūnn teh io âng-enn-á, hi-bāng i thé-liōng guá ê khùn-lân, i tsiáh tsiām-tsiām p̄ng-tsīng--lòh-lâi. Khó-kiàn káu-á ū līng-sing, ū kì-tī mā ū tshim-lòh ê kám-tsīng, tsing-tsha bē kóng-uē. Koh, káu-á bô sòo ê khài-liām, kiám-tshái kan-ta ē-hiáu hun “ū “ kap “bô “ niā-niā.

2011 7-guèh 18 guán puann-lâi Lâi-uī. Oo -tshuì, Tsâi, Káu-kuài tàk-jit tī guán tuì-bīn ê tsháu-poo kiānn, hū-kīn ê Tiong-too làm-tē, Takao Bí-sút-kuán, í-kip Ài-hô-pinn mā ū in ê kha-jiah. Ū-sī in tuè guán lāu-bú kap guá khi bán tshó-kan-á, iām-sng-á, sī-tsing-kó, koh-ū siòk-tshing “ka-pi” ê Se-in-tōo ing-thô, tse kué-tsi tinn, in tsin ài-tsiáh, put-kò tsiáh siunn tsuē, sái--nih tiō ū 1-liáp 1-liáp ê tsí. Tsâi kap Káu-kuài sió-tuè tsáu-sio-uá, bú-á-kiánn tin-tin tong-tong ê kong-kíng, guá liáh-tsún iáu ū kuí-nā tang.

Oo-tshuì kap Tsâi tuà tī tsàu-kha guā-p̄ng kuà a-luh-mih-thang ê tsùn-pinn-á, Káu-kuài tuà tī tshù-lâi. Tsàu-kha kap tsùn-pinn-á put-kuán-sī m̄ng khui-khui. Tsâi kap Oo -tshuì “hó-kui-kí”, khuànn guán kuè hōo-tīng ū uānn ê-á, tsiū m̄-bat huáh-kuè tsit-ê “kài-suànn “. Guán tsú-tsia'h, piànn-sàu, sé-sann ê sī, Tsâi tō kã thâu-tsīng-kha láp tuà hōo-tīng, âm-kún tshun tng-tng jì'p-lâi tsàu-kha tsù-sīn khuànn, liân thâu mā tuè guán ê tōng-tsok teh tng-uát khi tsi't-pīng. Guá kún-sng-tshiò kóng, Tsâi ná 1-luì a-sah-gah-ooh (牽牛花), tuè jìt-kng teh seh. Guán lāu-bú kóng Tsâi tuì tsú-tsiáh tsiáh-nī hìng, āu-sì-lāng ún-táng tsò tōo-tsi. Tuì tsùn-pinn-á thang-kng ê ah-khuh-lih-tshiūnn thang khuànn-tiò'h thōo-kha-té ê kang-tē. Tsâi tsiānn ài khiā tuà hia tham, ná teh kàm-kang, tē-bīn ū tōng-tsīng tsiū puī. Guán lāu-bú kóng Tsâi ná “kuán-ke-bâ”, iōng Jit-gí kiò i “e-lah-sóo”. Kang-tē nā khuànn-liáu ah, Tsâi tsiū thán-khi-sin tó tuà hōo-tīng thâu-tsīng, i hit khian oo-puī-nng phòng-phòng ê pak-tóo kã kui-ê tshut-jip-kháu tsáh--leh, liân guán lāu-bú beh kuè, ké-i beh kã láp, i to m̄ kiānn m̄-khíng suá-uī, tsò i kã thâu khuè tiām hōo-tīng khùn, bē-su teh khuè tsím-thâu. M̄-tsiáh guán lāu-bú kóng Tsâi kòo-tsip, suà koh kã hō līng-guā 1-ê Jit-gí guā-hō “Oo-tsiáh-kuh” .

2012 9-guèh 21, pài-gōo, e-poo, guá tsiàu-guān tshuā in 3-tsiáh khi tuì-bīn ê tsháu-poo. Thong-siōng kàu bô tshia, khòng-khuah ê sóo-tsāi, guá tsiū kã káu-soh-á tháu-khui, hōo in tsū-iū. Hit-kang Káu-kuài khioh--tiòh 1-ki tuā-ki ti-kha-kut, beh gè, hōo guá kã hiām-tsáu, suà--lòh Oo-tshuì mā uá--lâi beh tsiáh, iā hōo guá kuánn. In n̄ng-tsiáh tuè gúa seh kàu 1-ê uat-kak, guá tsiáh khuànn-tiòh kha-

pōo bān, tiānn-tiānn ah-bué ê Tsâi hñg-hñg teh gè 1-hāng mih, tshé--khí-lâi tsiū-sī hit-ki kut. Hit-tiáp guá tsham Káu-kuài, Oo-tshuì teh kiānn tsit-pîng uá tuā-lōo, sam-put-gōo-sī ū thôo-lah-kuh king-kuè. Káu-kuài ê síng bē-tsíng tiānn, pàng i tī tsia bô kā tuè, guá bē hòng-sim, tú-hó hín tsháu-poo iā ū lāng teh kóng goo-luh-huh (golf), kiann-liáu nā hiông-hiông nng--kuè khah guí-hiám, koh Tsâi ê uī-tñg it-hiòng pí in nñg-tsiáh khah íong, ti-kha-kut mā m̄ sī tsiam--ê, kui-khì hōo sng--1-sī, tsiū bô tsáu-kuè-khì kā Tsâi tòng. Kuè-liáu-sin huê-sióng, nā kā Káu-kuài kap Oo-tshuì pāk--leh, khan--leh, sūn tsháu-poo ê kinn tsáu-khì kā Tsâi tsâm, huān-sè, Tsâi tsiū bē sí ? He ti-kha-kut kám-sī ū hē-tòk ? Sīm--tsit-ē, Tsâi nng-kuè tsháu-poo lâi tshuē guán. Hit-tsūn thôo-kha ū lu-tsháu-ki kuah-phù--khì ê goo-luh-huh-kiū, Tsâi kap Káu-kuài kā sng 1-ē-á. Tsâi bē hiah gōng tsiáh goo-luh-huh-kiū lâi-bīn ê mih tsiah tiòh!

Hit-mê 10-tiám Tsâi thòo káh, àm-tng tsiáh--ê tsiáu thòo--tshut-lâi, puànn-mê koh làu-sái. I pún-té íong-sin, m̄-bat pēnn kah tsiah siong-tiōng. Tsâi khó-ling kám-kak tsiong ka-kī tsham Oo-tshuì tuà ê sóo-tsāi uè a-tsa, tsin tuì-put-tsū, suah phak tuà i thòo, làu ê lâ-sâm tng-kuān, ē-puànn-sin tsim kah sip koh sng-tshàu, lian i ê hīnn-á mā kô-tâm--khì. Keh-tng-kang thàu-tsá tshuā in 3-tsiáh tshut--khì, Tsâi tī tiān-thui lâi-té koh làu-sái. Kàu tuì-bīn hit-tè tsháu-poo, i tō bô lát thang kiānn, kā thau tú tuà kē-tshiū-á ē-té ê phāng kap thôo-bah--nih, bák-sin khuànn--khí-lâi tsin sue-jiók. “Sió jím-nāi leh, 9-tiám pēnn-īnn tō khui, lán suí kuè--khì!” Tsâi m̄ tsiáh, tsē-tshia khì pēnn-īnn ê lōo-tōo-tiong koh thòo. Siū-i kā tsū 3-ki-siā koh tih-tuā-tāng. Tng-lâi í-āu, Tsâi bô koh thòo kap làu. Hit e-poo, guán tshuā Oo-tshuì kap Káu-kuài khì bí-sút-kuán ê nā-á, kā Tsâi phō--teh, i koh beh lōh-lâi kiānn, thang pàng-jiō. Hit-jit bueh-àm-á Tsâi ū thòo 3-pài, put-kò lóng kan-ta thòo tsit-sut-á thàu-bing sió-khuá ñg ê mih. Khuànn i bô siánn ū guān-khì, tông-mê koh tsài i khì tshuē siū-i. Hit-tsūn kā phō--leh, kám-kak i hang-hang, ká-ná huat-sio. Tsâi koh hông tsū-siā, tih-tuā-tāng. Keh-tng-jit 9-guèh 23 sī lé-pài, siū-i kiò guá thàu-tsá koh phō i lâi--1-tsuā, nā pēnn-tsing bô kái-siān, tiòh-ài jip-īnn, thang thiu-hueh kiám-tsa. Tsiào hiān-tshú-sī ê tsing-thau kā khuànn, siū-i kóng Tsâi bô thun-lòh 「異物」, hi-bāng tsí sī kip-sing uī-tñg-iām, tñn-sī bô pài-tú kuann á-sī io-tsí pēnn-piàn ê khó-ling-sing. 9-guèh 23 tsá-khí, Tsâi ê sio thè ah, ba' k-sin khuànn--khí-lâi ke khah kim. Siū-i koh kā tsū-siā, tih-tuā-tāng, kóng bián jip-īnn, keh-tng-kang tsái-sī tsiah koh tshuā i lâi tō hó, nā bô koh thòo, ē-sái iōng tsuí tsú kuá bah hoō i tsiáh.

Hit-mê Tsâi kan-ta thò 1-sut-á tsuí. Íng-kùe i tsiânn iau-kuí, tann beh tshī i bah, tshì 2-pái, i lóng m̄ tsiáh, kiông-beh hō Oo-tshuì kā tshiúnn--khì. Āu-lâi Tsâi kiu tuà uá m̄g ê kak-sì thán-khi-sin tó--leh.

Sio-liân-suà n̄g-kang Tsâi phuà-pēnn, guá iā bú kah tsiânn thiám, hit-mê 8-tiám guá tsiū khùn--khì. 9-guéh 24 thàu-tsá 2-tiám-puànn tshénn, tsiah tsuān tiān-náu khí-lâi tsò-sit. Kàu 5-tiám, tsún-pī beh tshuā káu-á tshut--khì, guán láu-bú tú-hó iā tshénn, kóng tsàu-kha hia tsin tshàu. Guá liáh-tsún Tsâi koh thò á-sī làu-sái. Tshut--khì kā khuànn, thò-kha tshing-khì koh tsíng-tsê, bô thún--kuè ê jiah. Tsâi tó tī sé-sann-á-ki pinn--á, p̄ng-siōng-sī i siōng kah-ì ê 1-ê kak-lòh, thán-khi-sin, kā kiò, i bô tín-tāng, kā bong, i ê sing-khu líng-ki-ki ngē-khiak-khiak, bák-tsiu khui 1-bâi-á, tshìu--khì hiàn 1-phāng-á, ing-kai tī khùn-bāng-tiong t̄ng-khui, kuè kuí-nā tiám-tsing-kú ah. Tsâi ê sing-khu ù tuà thò-kha hit-p̄ng, siap oo-sik ê tsiap. Guá kā i phō--khí-lâi, hē tuà 1-kha tsuá-khueh-á--nih, kā tsùn-pinn-á tshing-tshing liū-liū leh. Phóo-thong-sī tsin gâu tshá ê Káu-kuài, tsit-sī tiām-tsuah-tsuah, Oo-tshuì mā bô hinn puànn-siann. In ká-ná tsai, lāu-bú, p̄ng-iú, í-king íng-uán lī-khui ah.

Guá tsiàu-siōng tshuā in n̄g-tsiáh khì làm-tē kiânn tiám-guā-tsing, kui-ê sim tsiâu bâ--khì. Tsit-kang pún-tsiânn beh koh tshuā Tsâi khì tih-tuā-tāng, bô-gī-gō suah piàn-tsiânn-tsò mooh i ê sin-si khì hué-huà. Kā Tsâi khng tuà tshia-té, bong tsuá-khueh-á-lāi ê sok-ka-lok-á, hin lāi-té, Tsâi puī-puī té-té ê kha, tsiam-tsiam ê thâu, tshuì-pue, phīnn, bák-tsiu, bīn-lōo-á, puī-n̄g ê pak-tóo, tuā-phiànn ná oo-bōng-ní ê hīnn-á, bong-tiòh iū-guān hiah-nī sik-sāi, tsin-si' t, hun-bīng...tsóng-sī koh bô juā kú tō tsiâu huà-tsò hué-hu ah. Tsuè-āu 1 pái kā Tsâi so, guá ê bák-sái tih bô-suah.

Siōng-tè thong-kuè Tsâi 8-tang-guā ê sènn-miā, òng guá tián-hiān ú-tiū tiong-kan khuà-bút-tsíng ê tshim-thiànn, tsit tsióng tan-sūn kian-tīng ê tsíng-gī oh-tit tui lāng ê siā-huē tshuē--tiòh.

Tsâi tī tshiu-thinn lī-pia' t, ū 1 tsióng kiô-á-sik tsháu-á-hue hō-tsò nâ-ti-hīn, tú-hó tī tsit ê kuì-tseh tuā-khui. Tshú-āu tak-nî tshiu-thinn tsí-nâ sè-luí-hue nā tī tsháu-poo thàm-thâu, guá tsiū kám-kak, tsit-sè-kan ê 1-uī tsi-hó pîng-iú, guá ê soulmate, Tsâi ê lîng-hûn koh tò-tńg--lâi, koh kap guán tâng-kiân, tī iû-guân tshenn-gín-gín, ji' t-thâu-si tshiō--lòh ê tshiu-ji' t tsháu-poo.



### 作者感言

鄭雅怡 臺師大臺文系博士生